

Longkang simen ganti saluran tanah

Pembinaan sepanjang lebih dua kilometer dijangka siap hujung tahun ini untuk atasi masalah banjir

KAMPUNG TELOK MENEGUN

- Pihak Jabatan Pengaliran dan Saliran (JPS) sedang memasang longkang simen di sepanjang sistem saluran di Kampung Telok Menegun dalam usaha mengatasi banjir di beberapa kawasan berdekatan.

Pengerusi Jawatankuasa Kemajuan dan Keselamatan Kampung Persekutuan (JKKKP) Kampung Telok Menegun, Hassan Musa berkata, kerja-kerja pemasangan itu dijalankan di kampung ini sejak tiga bulan lalu.

"Saya dimaklumkan pembinaan itu melibatkan sepanjang lebih dua kilometer dan ia dijangka siap hujung tahun ini.

"Ia bagi menggantikan sistem saluran itu yang sebelum ini dibina daripada tanah.



HASSAN

"Bila hujan lebat pergerakan air terganggu ekoran banyak tanah serta sampah sarap tergendap di dasar sistem saluran itu," katanya.

Menurutnya, pembinaan itu adalah satu langkah bagi mengatasi banjir di beberapa kawasan seperti di Taman Maznah, Batu 3, Batu 4 dan Batu 5 di sini.



JPS giat menjalankan kerja menaiktaraf sistem saluran di sepanjang Kampung Telok Menegun dalam usaha mengatasi banjir.

"Kawasan itu kerap kali banjir sebelum ini melibatkan ratusan kediaman. Kali terakhir dilanda banjir adalah pada hujung bulan Oktober

lalu bagaimanapun ia tidak berapa serius.

"Menerusi penaiktarafan sistem itu, air daripada beberapa kawasan berkenaan da-

pat dialirkan ke Sungai Telok Menegun dan Sungai Klang tanpa sebarang gangguan.

"Ia sekaligus dapat mengelak kejadian banjir lebih-le-

bih lagi ketika hujan lebat kini," katanya.

Beliau berkata, projek itu sebenarnya sudah lama dicadangkan oleh kerajaan Barisan Nasional (BN) untuk dilaksanakan pada 2004 lalu.

"Bagaimanapun ekoran pertukaran kerajaan negeri daripada BN kepada Pakatan Rakyat (PR) menyebabkan ia tertangguh hampir tiga tahun.

"Kami sebagai penduduk di sini gembira dan bersyukur apabila projek ini diteruskan demi kepentingan penduduk," katanya.

Hassan berkata, pihaknya mewakili penduduk di kawasan itu berharap menerusi penaiktarafan itu, kejadian banjir dapat dielakkan lebih-lebih lagi ketika musim tengkujuh nanti.